

Batagaa kaj Žud n'a hantum

Citaaboo fahamandiroo

Žud ka batagaa woo hantum. Ir Koyoo Isa Almasihu kayn'aroo no (Matiyu 13.55; Marku 6.3). A mana batagaa woo hantum kala ganakey se nongu kul kaj ra i goo. A si šelaj kala dargantey ga kaj ga cee ci ganakey derandi. I m'i tangam nda šenney wey. A ga ganakey hoyray i ma koy jine naanayyan ra nda baji ra, i ma mooru zunubu.

Borey kaj se batagaa sanbandi maajney

nda fooyanoo kaj teendi i se

1 ¹ Agay Žud kaj ti Isa *Almasihu tam, Žak armaa^a ka batagaa woo hantum war kaj ciyandi se, de mo Baaba Irkoy baakey ti war, war jisandi Isa Almasihu se.

² Tamalla, nda alaafiya, nda baji ma kaa war ga nda boboyan.

Cawandikaw taariharkey

(Piyer bataga 2to 2.1-17)

³ Ay baakey, ba kaj ay hanse ka baa ya hantum war se hallasiroo kaj ra ir ga marga ga, a tee ya ne tilasu ya hantum war se hala ya duu ka war hoyray war ma gurgay naanay se kaj nondi Irkoy boro henanantey se cee folloku. ⁴ Zama boro fooyaj tugu ka huru ganakey game. A gay ngi ciitoo harandi *Citaaboo ra. I si hunbur Irkoy, i ga Irkoy *anneemaa bere k'a tee haya futu boonayyan. I g'ir jineboro follokaa kaj ti ir Koyoo Isa *Almasihu yankar.

⁵ Ay ga baa ya war hongandi, ba kaj war ga haya kul bay, kaj ir Koyoo na jamaa hallasi k'a kaa Misira gandaa ra jina, woo banda ga, a na borey halaci kaj mana naanay. ⁶ Almalaykey kaj mana ben ngi dogeys ra, i na ngi gorodogey naaj, a n'i gaala nda gaala kaj si hun i ga, k'i dii kubaa ra hala zaari beeroo ciitoo hane. ⁷ Takaa din da Sodom, nda Gomor, nda koyrawey kaj g'i kuubi k'i bere na ngi boj noo izefututaray se ka marga ka kani nda takari dumi tana. I nondi ka tee himakasinay nuune abadantaa zukandoo se.

⁸ Takaa din da borey wey nda ngi handirey ga ngi gaahamoo žibandi, i ga koytaraa kaynandi, i ga beenaa hinikoyey wow. ⁹ Ba almalayka jinehunoo Minkaylu, waatoo kaj nga nda Ibilisi ga cere cendi Musa kunturoo ga, Minkaylu mana yadda k'a wow k'a zukandi, a nka nee a se: «Ay Koyoo ma zahā ni gal». ¹⁰ Amma borey wey ga hayayaŋ wow kaj i s'i bay. Ngi fahamaa man'ti kala sanda adabba kaj sii nda lakkal miileyan. Woo no ma kate ngi halaciroo. ¹¹ I bone, zama Kabila fondaas bande i hanga. ^b I na ngi boj daŋ dereyan ra nooru maaganda sanda Balam. ^c I halaci sanda Kora kaj halaci tureyanoo ra. ^d ¹² I ga tee sanda žibi ndellayaŋ war armataray ſaadogey ra. I ga ḥaa ka haj ka too bila hunburay, i si honga kala ngi boj de. I ga hima nda duulayaŋ kaj ra hari sii, de hewoo g'i zaa. I ga hima nda jamde tuuriayaŋ kaj ga ize sii kaj buu cee hinka, i dogandi. ¹³ I ga ngi teegoy haawantey boosandi sanda takaa kaj nda teekoo bonday gaabanteyayaŋ ga ngi kufoo warra. I ga hima nda handarayyan kaj si bay nongu kul kaj ra ngi ga koy, kubaa bibiroo jisandi i se hala abada.

^a1.1 Matiyu 13.55; Marku 6.3.

^b1.11 Sintinoo 4.3-8.

^c1.11 Kabuyaney 22.1-35.

^d1.11 Kabuyaney 16.1-35.

¹⁴ Henok mo kaj ti Adama banda-ka-zunbu iyyantoo na annabitaray tee i ga ka nee: «Nga ne, ir Koyoo goo ma kaa, nga nda nga almalayka henanante zenber-zenberyaj, ¹⁵ ka borey kul ciiti, ka borey kaj si hunbur Irkoy zukandi ngi goy laalawey se kaj i n'i tee ngi futuyanoo ra nda ka zunubu teekey kaj si hunbur Irkoy zukandi šenni laaley din kul kaj i n'i har a ga se.» ¹⁶ Borey din man'ti kala juunujuunukoyniyan, i mma hēe nda ngi takaa. I ga dira nda ngi boonay futawey. Deeney ga beeri, i ga borey meekaanay haya maaganda se.

Hoyrayyan ganakey se

¹⁷ Amma war, ay baakey, wa honga hayey kaj ir Koyoo Isa *Almasihu *diyawey n'i har za i mana tee. ¹⁸ I nee war se: «Waati koraa ra, poopokoyniyan ga bangay, i ga dira nda ngi boonay futawey kaj ga mooru Irkoy.» ¹⁹ Ngi ti borey kaj ga kate fay-fayyan, i si hongu kala nda adamize takaa, Irkoy *Hundoo sii i kone. ²⁰ Amma war, ay baakey, wa koy jine war naanaa kaj ga hanse ka henan ra ka Irkoy jaaray Hundi Henanantaa albarkaa ra. ²¹ Wa cindi Irkoy bajoo ra k'ir Koyoo Isa Almasihu tamallaa batu kaj ga war noo hunayan abadantaa.

²² Wa hinna borey ga kaj ga šikka-šikka. ²³ Wi hallasi k'i kaa nuunaa ra. Borey jerey, wa hinna i ga, amma nda hunburay: war masi too ba ngi bankaaraa ga kaj ngi hundi-ibaayoo n'a žiibandi.

Irkoy saabuyan kokorantaa

²⁴ Boraakaj ga hin ka war dii war masi kaj, ka war kayandi bila laybu nga daržaa ra nda jaaliyan, ²⁵ Irkoy follokaa, ir Hallasikaa, Isa *Almasihu ir Koyoo albarkaa ra, darža, nda beeray, nda gaabi, nda hini ma bara a se za zamaney mana tee, nda sohō da, hala abada. Amin.